

金人二十斤繒三百匹後安日為降民所殺漢立其弟

末振將代時大昆彌雌栗靡健翎侯皆畏服之告民牧

馬畜無使入牧師古曰勿入昆彌牧中恐其相擾也國中大安和翁歸靡

時師古曰勝於翁歸靡時也小昆彌末振將恐為所并使貴人烏日

領詐降刺殺雌栗靡漢欲以兵討之而未能遣中郎將

段會宗持金幣與都護圖方略立雌栗靡季父公主孫

伊秩靡為大昆彌漢没入小昆彌侍子在京師者久之

大昆彌翎侯難栖殺末振將末振將兄安日子安犁靡

代為小昆彌師古曰末振將之兄名安日安日之子名安犁靡漢恨不自責誅

末振將○宋祁曰越本無責字復使段會宗即斬其太子番丘師古